

Dörfleischter 2003

Üses Kongrässhuus schynt i nöier Pracht,
Äs Bijou heig me us däm alte Schuppe gmacht,
Und d' Stüehl sig' alli pouschteret u nigunagu-nöi,
Doch darf me die nid bruche für üs Fasnachts-Söi,
Isch's der Zunft ächt glunge, u hei si gnue Stüehl gfunge ?
Mir sy nid sicher gsy und hei drum no es paar derby !

D' CTS die git üs langsam scho chlei z' dänke,
Üs isch klar, dass me nid aues cha verschänke,
Doch was die sich leischte, finge mir zum göisse,
Därewäg e huffe der Faschingszunft go höische,
Und ou bim EHC tuets gopferdecku weh,
Wett d' CTS äch d' Goofe lieber kiffe gseh ?

Üsi nöii Outobahn isch e grosse Hit,
Wotsch ab uf d' Böim, de bisch jetz ganz schnäu wyt,
Jetz sy mer verbunde mit der grosse Wält,
Doch bim zrüggocho merksch, das z' Biel öppis fählt,
Chasch zwar im Kreisu kreise, bis nümme weisch wie reise,
Äs wird dir troztdäm no nid glinge, d' Bieler Umfahrig z' finge !

Im Bundesbärn hett ds Ruthli Dreifuess zäme packt,
U derfür chunnt ds Micheline Calmy-Rey uf Platz,
U die tramt scho gly mit ihne zwöi Scheichli
Zmitts i Fettnapf dry, doch rächt hett si derby,
Der Blocher tschaup't nid chly, dä gumpet grad ganz dry,
Wie chönnt's ou angers sy bi so m' ne Zürcher Eseli !

D' Expo isch verby mir bedure das e chly,
Jetz wüsse mir für i Usgang nümme rächt wohi,
Ou ds Terminal B isch scho nienemeh,
Wo der EXPO-Stöckli jede Tag hesch gseh,
Verby isch's jetz mit Cüpli u prominänte Gescht,
Housi hie und Housi dört, u ds ganze Johr es Fescht,
Chasch nümme tagelang vor Helix abegaffe,
Jetz muesch Du ändlech ändlech wieder öppis go schaffe !

Bi der Expo hesch du nume müesse warte,
Warte, warte, warte, und no einisch warte,
Die Idee hett jetz der Scherrer übernoh,
Dass me z' Biel ou immer cha go Schlange stoh,
Jetz muess me nämlech o - stundelang astoh,
Wenn der Gaswärk-Parkplatz mit dym Chare wotsch verloh !

Üse nöi Zentralplatz isch e wahri Pracht:
E tolli Belüchtig, wo nüt nützt ir Nacht,
Und äs alts Tramhüsli, aber ohni Swatch,
Chasch übere Platz loufe, wie du nume wotsch,
Und als Belag e brune – und öppe jo kei wisse,
Dass der Waudeli ungeniert a Bode cha schiisse !

Dä Nachtumzug söu d' Bieler Fasnacht nöi beläbe,
Mir fröie üs u hoffe, äs sigi nid vergäbe,
Denn eis tuet üs beschäftige, mir chöme do nid druus,
U hirne u hirne, äs isch e grosse Gruus,
Dä Umzug isch am Obe, oje-ojemineh,
Wenn's fiischer isch, de cha me ne jo gar nid gseh !